

*Bosna i Hercegovina
Federacija Bosne i Hercegovine
Kanton Sarajevo
JU Treća gimnazija
Vijeće roditelja školske 2024/25. godine*

Sarajevo, 25. 02. 2025. godine

ZAPISNIK

Treće redovne sjednice Vijeća roditelja

Treća redovna sjednica Vijeća roditelja održana je 25.02.2025. godine u biblioteci Treće gimnazije sa početkom u 18.00 sati.

Sjednici je prisustvovalo 19 članova Vijeća roditelja od minimalno potrebnih 13 članova, što je kvorum za održavanje sjednice Vijeća roditelja prema članu 16. Poslovnika o radu Vijeća roditelja. Odsutno je bilo 5 članova Vijeća roditelja od kojih su 3 najavila svoj izostanak (gđa. Šejla Vojniković (I2), g. Alija Vegara (IV4) i gđa. Almira Muhović (IV5)), a g. Kenan Čaklović (I4) i gđa. Ajla Dautbašić (IV3) su nenajavljeno odsustvovali.

Gospođu Dariju Ramljak (I6) na sjednici Vijeća roditelja je mijenjala gđa. Belma Čečo-Bakrač, g. Tihomira Veselinovića (II3) u Vijeću roditelja sada mijenja gđa. Lejla Hujdur (dijete g. Veselinovića je promijenilo razred) a gđu. Irmu Sokolović (III2) je mijenjao g. Evelin Sokolović.

Sjednici Vijeća roditelja prisustvovali su i predstavnici škole JU Treća gimnazija i to direktorica škole gđa. Amra Čolić, pedagog škole gđa. Hasija Dedović te psiholog škole gđa. Emina Kasapović.

Predloženi dnevni red sjednice bio je:

1. Usvajanje Zapisnika sa Druge redovne sjednice Vijeća roditelja JU Treća gimnazija
2. Izbor podpredsjednika Vijeća roditelja (dijete g. Tihomira Veselinovića je prešlo u drugo odjeljenje čime je prestao njegov mandat u Vijeću roditelja)
3. Analiza uspjeha u učenju i vladanju na kraju I polugodišta
4. Izvještaj o utrošku novčanih sredstava za unapređenje odgojno - obrazovnog rada škole u saradnji sa udruženjem "Alumni Treće gimnazije"
5. Upoznavanje sa aktivnostima Koordinacije Novo Sarajevo VROŠŠ Kantona Sarajevo
6. Informacija o radu Komisije za ekskurziju
7. Dan otvorenih vrata „Naših ruku djela“ - informacije
8. Projekti interkulturalne razmjene učenika (Češka, Turska i Japan) - informacije
9. Tekuća pitanja

Dnevni red je usvojen jednoglasno.

Ad/1

(Usvajanje Zapisnika sa Druge redovne sjednice Vijeća roditelja JU Treća gimnazija)

Zapisnik Druge redovne sjednice Vijeća roditelja usvojen je jednoglasno.

Ad/2

(Izbor podpredsjednika Vijeća roditelja)

Članovi Vijeća roditelja predlagali su kandidate za podpredsjednika Vijeća roditelja. Kandidaturu je prihvatio g. Mirza Hulusić (II5) i jednoglasno je izabran za podpredsjednika Vijeća roditelja.

Ad/3

(Analiza uspjeha u učenju i vladanju na kraju I polugodišta)

Izvještaj analize uspjeha u učenju i vladanju na kraju I polugodišta je prezentovala gđa. Emina Kasapović, psiholog škole. Ova analiza će biti proslijeđena članovima Vijeća roditelja kao zaseban dokument.

Ad/4

(Izvještaj o utrošku novčanih sredstava za unapređenje odgojno - obrazovnog rada škole u saradnji sa udruženjem "Alumni Treće gimnazije")

Direktorica škole gđa. Amra Čolić je prezentirala Vijeću roditelja osnovne informacije o utrošku novčanih sredstava za unapređenje odgojno - obrazovnog rada škole u saradnji sa udruženjem "Alumni Treće gimnazije". Pozivu za saradnju sa udruženjem "Alumni Treće gimnazije", zaključno sa danom održavanja ove sjednice, odazvalo se svega 8% roditelja učenika škole (45 roditelja). Trenutno stanje na računu je 1835,9KM od čega su 663KM prenijete iz prethodne školske godine.

Od datih sredstava dobijenih uplatama roditelja na račun održanja "Alumni Treće gimnazije", navodi direktorica Čolić, kupljene su igračke za učenike sa posebnim potrebama, uplaćeno je po 100KM pobjedničkim odjeljenjima manifestacije "Decembarski dani kulture" (200KM su dodatno dobili kao donaciju) a plaćen je i autobus interkulturalne razmjene učenika iz Japana (prevoz do Bjelašnice). Iz ovih sredstava, prošle godine, data je potpora „Centru izvrsnosti“ škole čiji su članovi poslani na putovanje u Zagreb. Kaže da trenutno nema dovoljno sredstava za tradicionalno štampanje „Godišnjaka“ škole.

Imajući u vidu navedeno, Vijeće roditelja će proslijediti roditeljima učenika škole link promotivnog videa škole kojim se roditeljima pružaju dodatne informacije o vannastavnim projektima škole finansiranim sredstvima sa računa udruženja "Alumni Treće gimnazije" sa kojim škola godinama sarađuje.

Ad/5

(Upoznavanje sa aktivnostima Koordinacije Novo Sarajevo VROSŠ Kantona Sarajevo)

Predsjednica Vijeća roditelja gđa. Aida Aganović (III1) je obavjestila roditelje o radu Koordinacije Novo Sarajevo VROSŠ Kantona Sarajevo. Održane su dvije redovne i jedna vanredna sjednica Koordinacije.

Jedna od neizbježnih tema Koordinacije, kaže gđa. Aganović, je bio zahtjev roditelja djece jedne osnovne škole da se njihova djeca, njih 11, prebace u drugu osnovnu školu radi problema sa vršnjačkim nasiljem djeteta koje programom inkluzije pohađa osnovnu školu u kojoj je nastao problem. Zahtjevu roditelja je udovoljeno i njihova djeca su prebačena u drugu osnovnu školu.

Gđa. Aganović je obavjestila Vijeće roditelja da je ovoj Koordinaciji prosljedila inicijativu Vijeća roditelja Treće gimnazije o zahtjevu roditelja za mogućnost pravdanja izostanaka djece iz škole za pet dana u polugodištu (umjesto sadašnjih dva). Koordinacija je usvojila ovu inicijativu i prosljedila je dalje u proceduru prema nadležnom Ministarstvu za odgoj i obrazovanje Kantona Sarajevo.

Gđa. Aganović je Koordinaciji prosljedila i inicijativu za revidiranje Pravilnika o ishrani učenika u osnovnim i srednjim školama Kantona Sarajevo od pokrenutu od strane ovog Vijeća roditelja. Našoj Inicijativi su se pridružile i druge škole jer su problemi u kontekstu primjene navedenog Pravilnika mnogobrojni i dobro poznati. Inicijativa je poslata u proceduru a Koordinacija, za sada, nema povratnih informacija.

Gđa. Aganović je također Vijeću roditelja prenijela i informaciju Koordinacije da i ove školske godine za učenike osnovnih škola ostaje polaganje eksterne mature.

U kontekstu prenesenih informacija, gđa. Meliha Bošnjak (I3) je iskazala samo riječi pohvale i zahvale Trećoj gimnaziji vezano za program inkluzije koji provodi ova škola a u kojoj su ove godine 2 učenika. Ohrabrena je ovakvim nastupom škole konstatujući da je njeno dijete jednostavno „procvjetalo“ u ovoj školi.

Ad/6

(Informacija o radu Komisije za ekskurziju)

Direktorica škole gđa. Amra Čolić je obavjestila Vijeće roditelja da je škola već uputila poziv i odabrala agenciju za realizaciju ekskurzije. To je i ove godine agencija „Divan Karupović“. Uslovi realizacije ekskurzija sada su, kaže, izmjenjeni od strane nadležnog Ministarstva za odgoj i obrazovanje Kantona Sarajevo, a jedna od novina je i da više nije dozvoljena noćna vožnja učenika na ekskurziji. Navedeno je uticalo na povećanje cijene ekskurzije. Destinacija će i ove godine biti Španija, cijena je sada 1530KM za deset dana putovanja i boravka za pomenutu destinaciju. Ići će otprilike 140 učenika, dakle svi osim učenika koji su spriječeni (jer su npr. perspektivni sportisti i slično). Za nekoliko učenika koji nisu u stanju platiti ekskurziju prikupljaju se sredstva, i ova akcija je još uvijek u toku naglašava direktorica Čolić.

Zaključno sa danom održavanja ove sjednice, kaže, ostalo je da se prikupe finansijska sredstva za još 2 učenika škole pa se pozivaju svi oni koji žele pomoći da se obrate razrednicima trećih odjeljenja za informacije kako dostaviti nedostajuća finansijska sredstva.

Ad/7

(Dan otvorenih vrata „Naših ruku djela“ - informacije)

Direktorica škole gđa. Amra Čolić je iznijela neke osnovne informacije o Danu otvorenih vrata škole koji se održava pod nazivom „Naših ruku djela“, a planiran je za 25.04.2025. Konceptualno, Danom otvorenih vrata, objašnjava, se radi promocija Treće gimnazije kao odgojno-obrazovne ustanove prije svega učenicima osnovnih škola koji se pozivaju da ovom prilikom posjete školu.

Za tu svrhu će se u kabinetima škole organizovati radionice sa ciljem prezentacije svega onoga što ova škola nudi svojim učenicima.

Direktorica je napomenula da je naša škola 24 sata pod video nadzorom, da od 01.02.2025. godine ima dva dnevna čuvara te da je posljednjih godina puno toga rekonstruisano u školi ili obogaćeno novim sadržajima. Planiraju se i dodatni novi sadržaji.

Direktorica Čolić iskazuje dobrodošlicu svakom onom ko želi pomoći te na neki način uzeti učešće u određenim aktivnostima i projektima škole. Ta podrška može uključivati i različite vrste donacija ili sponzorstva aktivnostima škole (npr. podrška radu „Centra za izvrsnost“).

Ad/8

(Projekti interkulturalne razmjene učenika (Češka, Turska i Japan) - informacije)

Direktorica škole gđa. Amra Čolić je prezentirala informacije o projektima interkulturalne razmjene učenika. Škola je uputila javni poziv svojim učenicima za učešće u ovim projektima. Škola realizuje kako posjete naših učenika školama u Japanu, Češkoj i Turskoj tako i prijem učenika iz ovih zemalja u Bosnu i Hercegovinu.

DSD odjeljenje Treće gimnazije će, također, ove godine realizovati posjetu Njemačkoj, Austriji i Švicarskoj kao primjer podrške škole jezičkoj orijentaciji ovog smjera. Za ovu godinu planirana je također interkulturalna posjeta naših učenika školi u Turskoj i obrnuto.

Prilikom učestvovanja u ovim projektima, pojašnjava direktorica Čolić, imaju svi učenici naše škole iako je u ove aktivnosti posebno uključen „Centar za izvrsnost“ naših učenika.

Ad/9

(Tekuća pitanja)

Vijeće roditelja Treće gimnazije se osvrnulo na doček i gostovanje glumca Feđe Štukana u Trećoj gimnaziji povodom tematiziranja njegove knjige „Blank“ koju su neki profesori Treće gimnazije stavili u plan lektira škole.

Neki od članova Vijeća roditelja prisutnih na sjednici podržali su ovaj pristup određenih profesora bosanskog jezika, a pedagog škole gđa. Hasija Dedović je obrazložila da je gostovanje i obraćanje Feđe Štukana u Trećoj gimnaziji bilo „kontrolisano“.

G. Izet Turković (15) je otvoreno kritikovao ovakvo postupanje škole nazivajući ga neprihvatljivim. Glumac Feđa Štukan, istakao je, je osoba kriminalnog dosjea (po vlastitom priznanju drogirao se heroinom te radio kao makro držeći 5 prostitutki, opaska zapisničara) koji svojim javnim nastupima direktno, a navedenom knjigom indirektno, inkriminira Armiju BiH kao zločinačku implicirajući da on iz moralnih razloga nije mogao biti njen pripadnik jer nije želio „snajperom pucati po civilima“.

G. Turković smatra Feđu Štukana zlonamjernim patološkim lažovom koji svojim iskazima o Armiji BiH relativizira zločine srpske vojske nad golorukim narodom koja je samo u opkoljenom Sarajevu ubila 11.540 građana od kojih su 1.600 djece, konstatira. Misli da ovaj glumac našoj djeci šalje krajnje destruktivnu poruku da drogiranje heroinom nije fatalno i da se moguće „skinuti“ sa heroina kada se to odluči.

Gđa. Renata Logić (III4) je u izrazito emotivnom obraćanju sa gnušanjem odbacila teze Feđe Štukana o Armiji BiH naglašavajući da je i njen suprug bio pripadnik iste. Citirala je podkaste (podkast kod Maria) u kojima Feđa Štukan govori kako su pripadnici Armije BiH od strane mudžahedina obučavani za klanje civila. S prezirom gleda na pomenutu knjigu „Blank“ kao i na istoimenu predstavu (adaptaciju knjige) Kamernog teatra 55, naglašavajući da neće dozvoliti da njeno dijete ide na takvo što.

G. Remzija Šetić (III6) se također kritički osvrnuo na posjetu Feđe Štukana Trećoj gimnaziji naglašavajući da su poruke koje šalje ovaj glumac neprihvatljive. U radu i iskustvu koje ima ne poznaje slučaj da se jedan korisnik droge heroina uspio osloboditi ovisnosti. Izjave pomenutog glumca smatra krajnje opasnim po našu djecu.

Dr. Osman Terzić (III5) smatra gostovanje pomenutog glumca u Trećoj gimnaziji izuzetno štetnim zbog uticaja koje takve osobe mogu imati na omladinu. Smatra da mladi danas puno lakše prihvataju poruke ljudi iz tog miljea nego od npr. njega kao doktora.

Naglasio je da u svojoj praksi ne poznaje slučaj da se jedan korisnik heroina uspio izliječiti ovisnosti od ove droge.

G. Mirza Hulusić (II5) se izrazito kritički osvrnuo na gostovanje pomenutog glumca nazivajući takvo što „neprihvatljivim propustom“. Konstatuje da nema osnova da se Feđa Štukan, ni moralno ni kao književnik ni kao umjetnik, predstavlja našoj djeci u bilo kojoj formi heroja ili nekakvog autoriteta što je škola svojim postupanjem omogućila. Škola ne smije, ni u kom slučaju, takvo što promovirati, podcrtava.

Smatra nevjerovatnim činjenicu da neko „juče“ objavi neku knjigu a ona da se ona već „danas“ pojavi kao lektira učenicima škole bez ikakvih prethodnih provjera. Kako je takvo što moguće, pita. Razmišlja li škola, pita se, kako roditelji sada da saniraju štetu nanесenu njihovoj djeci jednim ovakvim predstavljanjem stvari. Kategorički se izjasnio protiv odvođenja naše djece na već pomenutu predstavu Kamernog teatra 55.

Direktorica škole gđa. Amra Čolić je konstatovala da su roditelji i škola tu da zajedno djeluju i sarađuju, te da će škola reagovati na propuste.

Treća redovna sjednica Vijeća roditelja završena je u 19.45 sati.

Zapisnik sastavio:

g. Izet Turković, sekretar Vijeća roditelja



Zapisnik ovjerila:

gđa. Aida Aganović, predsjednica Vijeća roditelja

